

嘉靖惠安縣志

—

K295.74

3

天一閣藏明代方志選刊

惠安縣志

一九六三年十二月上海古

籍書店據寧波天一閣藏明

嘉靖刻本景印原書版框高

一八·〇公分寬一四·七公分

惠安縣志序

地里之書昉於九丘至周而外史掌之所以得玉籍
古詔地事以知地俗其由來遠矣惠安舊屬晉漆水
太平興國始自爲縣雖疆里僅齒中邑而川嶽效奇
賢哲拔秀在閩猶可甲乙數獨典章文物殘落莫稽
曠百餘年未有任紀載之責者豈非邑之大闕典與
嘉靖庚寅封川莫侯敬中爲縣之二年觀風采言知
邑志闕狀廼以屬之鄉大夫張君維喬君既爲之旁
考博詢裁成義類而又各爲論敘以發之有激而慨
有婉而引蓋自建置以至人物凡十三卷而因革損

益之故織悉具之矣書成侯乃命工升之梓且不鄙
謬懇予序予惟志之繫於治不小也顧簿書期會事
吏治者恒亟亟焉而舉墜葺廢稽古攷文則非吏而
儒者不暇以爲莆去惠安百餘里侯之政聲得于耳
者熟矣及觀是編則其賢有足徵者嗣是吏于土者
能寓覽而自得之則星野有常易簡見焉流峙隨化
動靜具焉鼓舞盡利康阜基焉變通趨時道德一焉
又審於五材也微以盡物又制於五用也明以盡民
又和於上下也幽以盡神又睹夫才也思所造之又
省夫職也思所修之又慕夫獻論夫世也思所尚之

則仕有定守治有常師化流海隅以輔成丕冒之治
皆有待焉者是固侯之志而作者之徵也予不揣僭
述于篇俾繼治者攷焉

賜進士出身奉議大夫湖廣等處提刑按察司僉事
莆陽林應標書

惠安縣志目錄

卷之一

建置

形勝

封域

圖里

險塞

卷之二

山川

潮汐

卷之三

土田

水利

橋梁

卷之四

風俗

卷之五

物產

卷之六

戸口

田賦

卷之七

課程

上供

支費

職役

卷之八

公宇

卷之九

學校

卷之十

典祀

丘墓

叢祀

卷之十一

秩官

卷之十二

選舉

卷之十三

人物

右惠安志十三卷嘉靖庚寅春邑大夫莫侯敬

中以纂述之職屬余余爲采摭故實旁徵故老
聞見擇其可以厚民生善風俗興政務者次第
成卷卷有題辭不發凡起例而所以纂述之意
各於敘論見之其非吾邑之故不以勦入傳曰
所見異辭所聞異辭所傳聞異辭時世有遠近
則其辭不能無詳略也自有邑以來至今上下
五六百載中間陵谷之變尚不能盡同況於時
事之因革從宜寢遠寢忘豈一人一日所能盡
識是故其遺落多矣若夫記述近事欲以厚生
善俗而興政務區區之辭感發於所見聞有不

覺其繁且多者世必有讀余言而得余心則是
十三卷者其亦足備吾邑之芻蕘也與淨峰張
岳維喬書

惠安縣志卷之一

邑人淨峯張岳維喬

閩越之墟實維星紀井絡支分南循海澨爰考圖經
參度形勢剖割晉江縣道攸制履至都圖山川險易
翼翼戢戢式相承比匪維地征維民作人志建置形
勝封域圖里險塞目凡五

建置

閩自漢武遷其民於江淮之間其遺民亡不從遷者
聚爲冶縣建安初始置候官建安南平漢興等五縣
吳末安三年以建安爲郡增置建平東平將樂昭武

東安并舊縣凡九晉大康二年又以候官東安爲晉
安郡梁天監中又折晉安置南安郡至隋改晉安爲
泉州治三山廢建安南安二郡以屬之唐嗣聖十六
年復折泉州之南安莆田龍溪置武榮州治南安景
雲二年改武榮爲泉州舊泉州爲閩州開元八年折
南安置晉江縣泉州徙治焉宋太平興國六年始折
晉江東鄉十六里置惠安縣

論曰攷吾邑建置始末如此三國時屬候官晉屬晉
安梁隋及唐屬南安開元以後屬晉江至宋乃自爲
縣也然今縣北龍窩嶺下有古縣遺址市廛私諱與

今治所頗相類豈始基於此而後乃遷與蓋不可攷矣

形勝

大帽山南馳爲雲峰東平卧龍諸山至螺山端整圓秀而縣治負焉東爲東嶽山其西少北爲蓮華峰蓮華之南爲登科山又南復東折里許有山卷然廻拱縣治曰樓山或曰留山言鎖截風氣去而復留也蓮華登科皆有奇石峭拔峙乎縣治之右而東嶽東麓支山培樓勢若退讓委伏不敢與之抗者昔人多建廟宇及浮屠以壯其勢水出蓮華峰下循螺山西址

經縣治前至樓山之陰鐫以石亭出石亭東流入于
民田樓山之外尖峯秀聳曰文筆山復東而北爲靈
瑞山逶邐十五餘里至峯崎山當縣治東北凡近邑
諸山自西北而東南復東而北者至此而窮青龍橋
在其下諸水匯焉北入于海

論曰余行天下見江南諸山由西北昆侖發原至岷
山乃拆而東爲楚越諸郡東北至吳淞際海而止江
漢水交流其下今以吾邑觀之亦然意天下山川雖
細大不侔其脉絡固有同歟古人建都置邑必審擇
山川風氣有以也夫

封域

環邑之疆竟西北跨山東南皆際海正北曰白水舖
距縣四十里其外則仙遊楓亭正南曰北鎮距縣五
十里其外則晉江後渚正西曰螃嶼嶺距縣三十五
里其外則晉江白洋正東曰小岞距縣四十五里其
外則大海西北則東坑寨後達仙遊下安里西南則
虎窟山達晉江何市東北則黃崎東南則崇武與小
岞俱大海云縱九十里橫八十里

論曰吾邑廣輪之數止是爾然且包山林並原隰桴
其中斬長綴短可耕之田不能紓三之一斥鹵者幾

惠安志卷一
三
半上承會府下引漳潮之衝并日以馳不足也夫不
察地利本末猥令豐瘠同科顓顓焉執計簿以取盈
爲事不已虧乎

圖里

初置縣時折晉江東北十六里領以三鄉其後復增
至二十里慶曆八年乃定爲十八里仍三鄉領之西
南曰崇武鄉領太康守節禮興民安長安東南曰崇
善鄉領平康歸化祥符溫陵安仁同信尊賢延壽東
北曰城山鄉領崇德德音光德待賢民蘇熙寧保甲
法行分三十四都置保正副元元貞元年更爲四鄉